

李文恭公遺集

李文恭公奏議卷六目錄

湘陰李星沅石梧著

男概編次

榛

陝撫

查明各屬倉庫情形摺子

附奏繙譯鄉試情形片子

請將崇杞林升補鄜州摺子

紳民捐輸請獎摺子

奏請展行繙譯鄉試摺子

附奏派充簾官片子

請將武訪疇升補鳳翔府知府摺子

附奏委署府州各員片子

奏報秋禾收成分數摺子

北山被雹地方懇

恩緩徵摺子

附奏王承武代還賠項片子

請再展行繙譯鄉試摺子

審明連殺一家二命人犯摺子

對調知縣摺子

北山歉收州縣懇

恩緩徵摺子

臨潼縣官民捐修城垣懇

恩鼓勵摺子

查明完場年老諸生摺子

李文恭公奏議

卷六目錄

官紳士庶捐輸請獎摺子

附奏陳謝免議片子

查禁私錢摺子

附奏京控咨交案件並無逾限片子

附奏委署府縣各員片子

覆奏府谷葭州被雹來春毋庸接濟摺子

典史疎防監犯砍斃人命奏參革審摺子

請獎獲盜出力人員摺子

附奏專摺陳奏保舉獲盜出力各員緣由片子

密陳司道府考語摺子

恭謝

頒賞福字摺子

查明錢糧完解數目摺子

附奏委署同州府知府片子

附奏委署廳縣各員片子

查明各屬倉庫情形摺子

奏爲查明各屬倉庫情形恭摺奏祈

聖鑒事竊

臣

接准軍機大臣字寄奉

上諭李德奏州縣虧空積弊一摺州縣倉庫爲國家分  
貯錢糧之地若如所奏始而新補舊終則新舊皆  
至成空初猶以雜抵正後則正雜悉歸無著以致報  
部報司之款延不批解於吏治國計大有關係著各  
直省督撫嚴飭司道知府體察情形或勒限飭令彌

補或及早清查參辦斷不准以積習相仍稍存瞻徇姑容之見等因欽此欽遵當卽恭錄轉行嚴飭確查核辦茲據藩司陶廷杰詳稱陝省七府五直隸州每年額徵地丁正項銀一百六十萬九千餘兩耗羨銀二十三萬七千餘兩雜稅鹽課共銀六萬四千餘兩內除州縣例存留支正耗銀三十四萬餘兩實應解司銀一百五十七萬兩有零均各按年分上下兩忙隨徵隨解不准留貯屬庫統於奏銷



前埽數全完間有榆林府屬因歉歲緩徵實欠在民爲數亦甚無幾惟本年春間查有郿縣故令陳椿冠正項虧絀卽在奏銷以前據實揭叅

奏辦此外並無查辦虧空之案亦實無攤捐彌補倉庫情事至常平倉糧通省共應額貯京斗穀三百二十五萬七千餘石截至道光二十三年十月辦理二十二年奏銷底止除節年出陳易新出借籽種共京斗穀一十二萬二千餘石應催令趕緊徵

還又兵借及平糶共京斗穀二十三萬四千餘石  
已扣價銀存貯司庫現催陸續買補又支給囚流  
各犯口糧共京斗穀六十六萬一千餘石例係作  
正開銷應俟籌議採買外實貯京斗穀二百二十  
三萬八千餘石業經該管道府等覆稱盤查各州  
縣倉庫均無虧短情弊由司核明請

奏前來

臣

查陝省各屬庫項歷係年清年款從無那  
新掩舊以雜抵正諸弊其倉貯糧石遇有支放徵

收均卽遴員盤驗結報年底又由道府通行盤查  
出結詳咨送部立法已極周備臣到任以來深恐  
日久弊生復經切札委查取具實在足額印結現  
查倉庫無虧尙屬可信惟錢糧絲粒皆關

國帑此時善全大局必須先事預防且倉糧每年收  
放多寡不同卽各屬實貯數目增減互異會計出  
納比之庫款尤難臣愚以整頓之方要在得人爲

亟州縣得人則倉庫不敢虧道府得人則州縣不

能虧未有州縣侵那而道府毫無聞見者亦未有  
道府查察而州縣仍至侵那者故於州縣專其責  
必於道府考其成臣總核仔肩任無旁貸惟有飭  
司督屬隨時嚴密鉤稽仰蒙

訓示肫詳尤當凜之又凜勉矢天良力祛積習無稍瞻  
徇姑容以期上副

聖主慎重權衡之至意所有查明陝省倉庫情形理合  
恭摺具

奏伏乞

皇上聖鑒訓示謹

奏 道光二十四年七月二十三日具  
奏奉

硃批知道了欽此

附奏繙譯鄉試情形片子

再

臣

前准禮部咨開本年各省駐防鄉試均改繙

譯每十名取中一名等因當卽咨查西安甯夏涼

州莊浪各駐防去後嗣據涼州副都統咨覆涼州

莊浪駐防此次繙譯竝無應試之人惟西安甯夏

駐防經該將軍等各考取繙譯童生五名已將試

卷送部

臣

正在核奏間復准禮部咨開各省駐防

童生試卷均未送到未便以西安甯夏所取試卷

各五本奏請磨勘應照奏定章程俟各省試卷彙齊後再行具奏等因知照前來是陝甘駐防所取繙譯童生照例不應鄉試所有本屆考官承領繙譯題紙應請毋庸拆封仍由考官敬謹齋回軍機處呈繳爲此附片陳明伏乞

聖鑒謹

奏

硃批另有旨欽此內閣奉

上諭李星沅奏陝甘駐防所取繙譯童生試卷送部後  
據禮部咨開應俟彙齊奏請磨勘是該生等照例不  
應鄉試等語本年各省駐防改應繙譯鄉試事屬創  
始所有西安甯夏駐防既據該將軍等各考取繙譯  
童生五名已合每十名取中一名之數毋庸俟磨勘  
後始行鄉試卽著該撫於文闈事竣酌定繙譯試期  
照例考試倘應試各生因道路寫遠一時未能到齊  
試期並著稍從展緩如展期後應試人數仍不足十



名著卽具奏停止欽此

請將崇杞林升補鄜州摺子

奏爲揀員請升北山要缺知州仰祈

聖鑒事竊照鄜州直隸州知州陳捷魁丁艱出缺業經

臣恭疏

題報在案所遺員缺係繁疲難兼三例應在外揀員  
升調該州地處北山界連甘肅訟案岐出緝捕較  
繁所轄三縣均資督率考核必須精明強幹之員  
方足以期整頓臣與藩臬兩司在通省直隸州知

州及同知并府屬知州內逐加遴選非現居衝要  
卽人地未宜實無合例堪調之員惟查有寶雞縣  
知縣崇杞林年六十一歲安徽進士由翰林院庶  
吉士散館以知縣卽用選授甘泉縣知縣道光十  
七年正月到任調補今職該員才明守潔幹練端  
方厯俸已滿三年竝無違礙處分以之升補鄜州  
洵屬合例亦堪勝任據藩臬兩司會詳請

奏前來合無仰懇

天恩敕部核覆准以寶雞縣知縣崇杞林升補鄜州直隸州知州實於北山要地有益如蒙

俞允該員係知縣請升直隸州應俟部覆至日給咨赴部引

見所遺寶雞縣知縣係衝繁難要缺容再揀員調補合併陳明所有請升要缺知州緣由謹會同督臣富呢揚阿合詞恭摺具

奏伏乞

皇上聖鑒訓示謹

奏 道光二十四年七月二十三日具

奏奉

硃批另有旨欽此內閣奉

上諭李星沅奏揀員請升北山要缺知州一摺著照所  
請陝西鄜州直隸州知州員缺准其以崇杞林升補  
照例送部引見該部知道欽此

紳民捐輸請獎摺子

奏爲紳民捐輸河工經費續懇

天恩優獎以示鼓勵仰祈

聖鑒事竊

臣

前准部咨以豫省河工需用浩繁奏明准

令各省紳民捐助經費遵照上屆海疆捐輸議叙

所捐銀兩就近解交藩庫兌收報部酌撥等因當

經督飭各屬諄切曉諭旋據三水等縣官民共捐

輸銀八萬一千一百兩由

臣

分別

奏請獎勵在案茲復據三原岐山郃陽盩厔長安咸  
寧淳化鄂縣南鄭隴州等十州縣稟報紳民續捐  
銀兩截至七月十九日止共解司銀五萬一千一  
百八十三兩由藩臬兩司按照捐數彙敘具詳請  
奏前來臣查該紳民等慕義心殷聞風踵接雖塵露  
難資小補而芹曝亦具微忱自宜一體飭收俾各  
及時報效隨就司議獎敘逐加參核與豫工事例  
及上屆海疆捐輸成案均屬相符相應分別等差

照繕清單恭呈

御覽仰懇

聖主逾格

恩施俯加獎勵以昭激勸至續捐銀數計四五百兩至  
五千餘兩

奏請議叙者共銀三萬二千零三十兩又咨部照例  
議叙者共銀一萬二千六百十三兩又不及議叙  
由外給予花紅匾額者共銀六千五百四十兩現



俱收貯司庫聽候撥用此外尙有稟報捐輸銀未  
解司容俟到日續行核辦謹繕摺具

奏伏乞

皇上聖鑒訓示謹

奏 道光二十四年七月二十三日具

奏奉

硃批該部議奏單併發欽此

奏請展行繙譯鄉試摺子

奏爲陝甘駐防繙譯鄉試遵

旨酌擬展期舉行仰祈

聖鑒事竊臣於八月十五日欽奉八月初七日

上諭李星沅奏陝甘駐防所取繙譯童生試卷送部後  
據禮部咨開應俟彙齊奏請磨勘是該生等照例不  
應鄉試等語本年各省駐防改應繙譯鄉試事屬創  
始所有西安甯夏駐防旣據該將軍等各考取繙譯

童生五名已合每十名取中一名之數毋庸俟磨勘  
後始行鄉試卽著該撫於文闈事竣酌定繙譯試期  
照例考試倘應試各生因道路寫遠一時未能到齊  
試期竝著稍從展緩如展期後應試人數仍不足十  
名著卽具奏停止欽此遵查陝甘繙譯鄉試事關兩  
省駐防西安近在同城甯夏則距陝省十八站道  
里旣遠山徑多迂卽限行咨會約須十日遞到其  
應試各生由彼至陝又非兼旬不能計期已屆十

月例行武闈兩考勢難並舉自應將繙譯鄉試稍

從展緩

臣

謹擬定十月十六日扃試彼時武闈既

畢而甯夏應試諸生行走亦甚從容不至再有遲  
誤現經分別飛咨西安甯夏將軍知照務須先期  
咨送飭令及早齊集候試倘諸生內遇有事故不  
足原取五名之數亦卽作速移覆以憑

奏明停止並咨陝西正副考官將原奉

欽頒題紙於揭曉日交

臣

親領深藏用昭愼密所有酌

擬展期舉行繙譯鄉試緣由理合繕摺具

奏伏乞

皇上聖鑒謹

奏  
道光二十四年八月二十三日具

奏奉

硃批該部知道欽此

附奏派充兼官片子

再本年文闈鄉試陝甘兩省應調內外兼官二十  
一員除甘肅例派三員外餘應陝省揀派查現任  
實缺州縣其進士舉人出身合例應調者每多現  
居繁劇及經手要件是以不敷考選遵照道光十  
年新例於候補分發人員中酌量添派由臣嚴密  
扃試擇其文理優長者始令分校計同考官十員  
內甘肅陝西實缺知縣共七員尙不敷三員以卽

用知縣龔衡齡大挑知縣曹映斗顧淳慶派充至  
兩省應試士子共計六千餘名經臣八月初六日  
入闈監臨場規均極安靜業將三場試卷督飭各  
官詳慎經理全數解交內簾仍畱提調監試二員  
住守隨時小心防範臣於二十日出闈回署辦事  
合併陳明謹

奏

硃批知道了欽此

請將武訪疇升補鳳翔府知府摺子

奏爲循例請補知府以重地方仰祈

聖鑒事竊照鳳翔府知府湯寬告請終養業經

臣恭疏

具

題所遺鳳翔府選缺聲明現有候補人員另行請補  
在案查定例各省道府同知直隸州掣獲盜犯引  
見發往原省以何項補用均無論應題應調應選之缺  
令該督撫酌量才具擇其人地相宜者悉准先儘



補用等語茲鳳翔府一缺所轄一州七縣遠連甘肅近接南山地廣事繁民風向多健訟全在知府認真整頓督率有方非老成熟悉之員不足以資治理查有候補知府武訪疇年四十二歲山西進士卽用知縣簽掣四川親老告近改掣陝西道光十三年二月到省補授清澗縣知縣調補鎮安縣知縣十八年十月到任二十一年

大計卓異嗣調長安縣知縣未經到任

奏升孝義廳同知併案引

見奉

旨准其升補二十三年九月到任復因拏獲盜犯引

見奉

旨武訪疇著仍回原省以知府用欽此旋據該員遵例  
加五成報捐離任接准部咨照例開缺歸入候補  
知府班內無論題調選缺悉准補用該員年強才  
練樸實勤明以之請補鳳翔府知府洵屬人地相

宜亦符定例據藩臬兩司會詳前來合無仰懇  
天恩敕部核覆准以武訪疇補授鳳翔府知府實於地  
方有裨如蒙

俞允該員係候補知府請補銜缺相當毋庸送部引  
見竝免查議叅罰合併聲明謹會同陝甘督臣富呢揚  
阿合詞恭摺具

奏伏乞

皇上聖鑒訓示謹

奏 道光二十四年八月二十三日具

奏奉

硃批吏部議奏欽此

附奏委署府州各員片子

再鳳翔府知府湯寬告請終養所遺員缺經

臣恭

疏

題報竝另摺循例請補查有甯陝廳同知俞逢辰明  
白謹飭堪以先委署篆又綏德州直隸州知州江  
士松七年俸滿奉文調取應行交卸赴部查有葭  
州知州凌樹棠敏練安詳堪以委署據藩臬兩司  
會詳前來除批飭遵照外合併附片陳明謹

奏

硃批覽欽此

奏報秋禾收成分數摺子

奏爲恭報陝省秋禾約收分數仰祈

聖鑒事竊照秋禾約收分數例應先行

奏報茲據西安延安鳳翔漢中榆林同州興安商州

邠州乾州鄜州綏德十二府州將所屬秋禾約收

分數開摺呈報由司具詳前來臣覆加查核統計

陝西各屬九十一廳州縣多寡牽算約計收成七

分有餘理合繕具清單恭呈

御覽伏乞

皇上聖鑒謹

奏 道光二十四年八月二十五日具

奏奉

硃批覽欽此



北山被雹地方懇

恩緩徵摺子

奏爲查明北山被雹村莊懇

恩分別緩徵仰祈

聖鑒事竊照北山榆林府屬之府谷縣於本年六月十

九日秋禾間被雹傷

臣

接據稟報卽經批飭確勘

去後茲據該縣沈雲驤會同委員署神木縣知縣

興綬逐一勘明被雹之前軍寨山等三村莊情形

稍重所種糜穀雜豆禾苗打折三四五分不等其  
在地者依然長發可望薄收村內貧民業已捐廉  
安撫又老莊村等七村莊亦有雹傷將來收成不  
過微減分數農民尙不乏食均毋庸另行調劑第  
邊氓積歉素少盡藏請將被雹十村莊無分輕重  
所有本年下半年新舊錢糧兵米及帶徵各年出借  
籽種概行展緩等情由藩司核議具詳請

奏前來

臣

查該縣地處北山歲收頻歉閭閻夙鮮儲

畜此次秋禾被雹之處若照常徵收錢糧民力實有未逮合無仰懇

天恩俯准將該縣被雹之前軍寨山等十村莊應徵本年下忙新舊錢糧兵米及帶徵各年出借籽種等項一概緩至二十五年秋後啟徵以紓民力出自鴻慈爲此恭摺具

奏伏乞

皇上聖鑒訓示謹

奏 道光二十三年八月二十五日具

奏奉

硃批另有旨欽此內閣奉

上諭李星沅奏查明北山被雹村莊請分別緩徵一摺  
本年陝西省榆林府屬之府谷縣秋禾間被雹傷雖  
據查明收成稍形歉薄毋庸另行調劑惟邊氓素少  
蓋藏若照常徵收錢糧民力未免拮据加恩著照所  
請所有府谷縣被雹之前軍寨山等十村莊應徵本

年下忙新舊錢糧兵米及帶徵各年出借籽種等項  
一概緩至二十五年秋後啟徵以紓民力該撫卽刊  
刻謄黃遍行曉諭務使實惠及民毋任吏胥舞弊用  
副朕軫念歉區至意該部知道欽此

附奏王承武代還賠項片子

再前任韓城縣訓導王承武應繳伊故父原任刑科給事中王松年罰賠庫項銀六千八百兩前據呈交銀三千兩業經臣彙摺

奏明在案茲該員於六月八月續行措完銀三千八百兩解司兌收貯庫核計尙在一年限內等情由司詳報前來臣覆查無異所有王承武限內全數完解銀兩緣由合併附陳謹

奏

硃批戶部知道欽此

請再展行繙譯鄉試摺子

奏爲陝甘駐防繙譯鄉試擬再展期合考請

旨遵行仰祈

聖鑒事竊照前奉

上諭本年各省駐防改應繙譯鄉試事屬創始所有西安甯夏駐防旣據該將軍等各考取繙譯童生五名已合每十名取中一名之數毋庸俟磨勘後始行鄉試卽著該撫於文闈事竣酌定繙譯試期照例考試



倘應試各生因道路篤遠一時未能到齊試期竝著  
稍從展緩如展期後應試人數仍不足十名著卽具  
奏停止欽此

臣

當卽欽遵酌定十月十六日開考恭

摺

奏明一面分咨西安甯夏將軍知照務飭及早來陝  
候試去後旋准該將軍等先後咨覆僅有西安駐  
防考生五名其甯夏所取五名內喀吞一名染患  
熱症未愈不能赴省應試是陝甘駐防繙譯各生

實屬不敷中額正在核奏停止間適准甘肅涼州副都統文祥將涼州莊浪二湍營考取繙譯童生五名試卷於八月三十日咨送禮部磨勘等情咨照前來臣查西安甯夏繙譯各生雖止九名合之涼州莊浪二營則有十四名足符十名取中一名之額既經該副都統咨送到部似應一律准考惟涼州距陝二十五站莊浪距陝二十一站甯夏距陝十八站此次繙譯鄉試事屬創始各路咨會往

復需時若仍以十月十六日開考計應試各生委  
難刻期而至且屆天寒歲晚跋涉未免增勞合無  
仰懇

聖恩

敕下禮部查明涼州莊浪二營考取繙譯童生試卷何  
日到部如蒙

俯准合考

臣

俟欽奉

俞旨謹擬再將試期展至來年二月十六日俾各士子

行走從容遵例應試勉希登進益廣

皇仁至原奉

欽頒題紙業於文闈揭曉日准陝西正副考官交

臣親

領嚴密深藏無虞洩漏所有再擬展期舉行繙譯  
鄉試緣由理合繕摺具

奏是否有當伏乞

皇上訓示遵行謹

奏  
道光二十四年九月二十四日具

奏奉

硃批另有旨欽此內閣奉

上諭李星沅奏陝甘駐防繙譯鄉試請再展期一摺西  
安甯夏繙譯各生現止九名應試其續經送部之涼  
州莊浪考取繙譯各生自應一律准其合考惟據稱  
歲晚路遙應試各生恐難尅期而至著照所議將試  
期展至來年二月十六日舉行以示體恤該部知道  
欽此

審明連殺一家二命人犯摺子

奏爲審明連殺一家二命人犯按律定擬恭摺

奏祈

聖鑒事竊照朝邑縣知縣程義勲詳報民人李升等挾  
嫌謀殺李春榮復故殺其父李方一家二命又毆  
砍李王氏李長慶受傷一案當經臣以罪關重大  
衅起細微必應嚴切根究批司提省委審去後茲  
據委員西安府知府李希曾督同該縣程義勲審

明定擬由臬司汪云任解勘前來

臣

提犯親鞫緣

李升籍隸朝邑縣范小閨兒郝雨春分隸河南閩鄉山西永濟等縣已死李方係李升無服族兄李春榮係無服族姪同村居住道光二十三年七月內李春榮胞弟李春發因欠李升錢一千文無償抵給李升錢袴一個旋即物故二十三年正月李春榮與在逃之何潤鎖李廷受先後至李升家閑坐李升起意彈錢賭博邀允李春榮等以箸作碼

李春榮輸欠李升錢七千文餘無輸贏是年七月  
李升借用李春榮麥一石言明秋後歸還迨後未  
給二十四年六月十六日下午李春榮往向李升  
索麥李升欲抵賭欠李春榮不依爭吵用拳打傷  
李升左眼胞經鄉約李得全勸散李春榮聲言次  
日不還必須控追竝稱伊家前曾被竊錢裙內裝  
銀數十兩今在李升家內自係偷竊定欲一併控  
究李升因李春榮逼討麥石不肯抵償賭債反被



毆傷又欲誣伊行竊懷忿欲毆慮其力大隨向素  
好之范小閨兒竝在逃之郝玉兒同雇工郝雨春  
告知糾允幫毆是夜該村演唱影戲李升料李春  
榮在彼觀看卽與范小閨兒郝玉兒分攜鐵鞭鋤  
柄小刀偕往戲場找尋李春榮未遇回至李升家  
內沽酒共飲三更時分俱入醉鄉李升談及李春  
榮憑空誣竊愈加忿恨起意將李春榮致死范小  
閨兒等均因酒醉允從李升腰插柴斧鐵鞭肩負

木梯范小閨兒郝玉兒仍攜鋸柄小刀郝雨春徒手同抵李春榮屋後李升令郝雨春在外看人自將木梯靠放牆邊同范小閨兒郝玉兒爬上牆垣將梯弔放牆內下院走至李春榮臥房門首探已睡熟房門虛掩李升等推門入內維時窗外月光照見李春榮仰臥炕上李升用鐵鞭毆其咽喉胸膛范小閨兒用鋸柄連毆其右手腕李春榮驚起喊救下炕欲跑李升范小閨兒郝玉兒各用鐵鞭

刀斧毆砍致傷李春榮偏右左額角左眉梢左胎  
膊左肱腋左手無名指右腿左右膝右臙肌腦後  
左耳根右臂膊左手腕右手食指左後肋右腿肚  
竝劃傷其胸膛右手中指左腿肚倒地擦傷左肋  
左肱肘何人毆砍何處各記不清李春榮之父李  
方聽聞趨至喊捉李升因李春榮傷重必死終須  
抵命復起意將李方一併殺害隨用鐵鞭毆傷李  
方左太陽穴左腮腋倒地亂滾又令范小閭兒用

斧亂砍致傷李方左額角左耳輪腦後帶傷左耳  
根擦傷右肩甲時李方之次媳李王氏同子李長  
慶趕出救阻李升用鞭毆傷李王氏左胳膊李長  
慶左手背范小閨兒用斧砍傷李長慶顙門均各  
倒地李升范小閨兒丟棄鞭斧與郝玉兒仍由原  
路越出向郝雨春告知情由分途逃逸李春榮李  
方旋各因傷殞命報驗獲犯訊詳提省委審查驗  
李王氏等傷俱平復逸犯郝玉兒弋獲無期隨就

現犯定擬由司轉解

臣

詳加鞫審詰以賭欠抵麥

爲數無幾控官誣竊亦止空言該犯何至頓起殺  
機連斃一家二命且從犯與死者素無嫌怨又何  
至聽糾同謀加功兇狠反覆研究據供前情確實  
委無起衅別情此外亦無同謀加功之人各犯逃  
後並無行兇爲匪及知情容留人家矢口不移案  
無遁飾查律載同姓服盡親屬相毆至死以凡論  
又例載殺一家非死罪二人者擬斬立決梟示酌

斷財產一半給被殺二命之家養贍又律載謀殺人從而加功者絞監候不加功者杖一百流三千里各等語此案李升因挾無服族姪李春榮逼討麥石不肯抵償賭債並被毆傷誣竊之嫌先糾范小閨兒等尋毆未遇起意謀殺夤夜越牆入室各用鐵鞭刀斧毆砍李春榮多傷復因其父李方踵至喊捉起意一併殺害又同范小閨兒毆砍李方先後殞命死係無服族兄一家父子二命應同凡

論李升除賭博及毆傷李王氏等平復輕罪不議  
外合依殺一家非死罪二人斬立決梟示例擬斬  
立決梟示照例於左面刺兇犯二字仍查明該犯  
財產酌斷一半同所欠麥石併給屍屬具領養贍  
范小閨兒聽從在場加功除又傷李長慶平復輕  
罪不議外合依謀殺人從而加功者絞監候律擬  
絞監候據供親老丁單秋審應入情實毋庸查辦  
郝雨春在外瞭望並未隨同加功合依謀殺人從

而不加功杖一百流三千里律杖一百流三千里  
至配折責安置李春榮聽從賭博本干律擬業已  
身死應毋庸議所欠李升賭錢係屬虛贓亦免著  
追逸犯郝玉兒及賭犯何潤鎖等飭緝獲日另結  
無干省釋各屍棺飭屬領埋兇器鞭斧鋤柄案結  
銷燬至此案彈錢賭博竝無賭具其失察賭博文  
武各職名容再查明開送除供招咨部外所有審  
擬緣由理合遵照刑部議定條欵恭摺具



奏伏乞

皇上聖鑒敕部核覆施行謹

奏  
道光二十四年九月二十四日具

奏奉

硃批刑部速議具奏欽此

對調知縣摺子

奏爲知縣人地未宜揀員對調仰祈

聖鑒事竊照陝省各屬州縣

臣

與藩臬兩司隨時留心

察看務期人地相宜以資治理茲查漢中府屬之  
署陽縣地處南山訟繁俗悍現任知縣譚瑀廣東  
舉人捐納知縣分發陝西

題署今職道光十七年十一月到任試署期滿實授  
該員年力強健辦事小心一切尙無貽誤惟才識

拘謹於南山地方不甚相宜未便稍涉遷就查有  
吳堡縣知縣蔣召南貴州舉人揀選知縣遵例捐  
納卽用選授今職道光二十一年十二月到任該  
員老成穩實恟懾無華以之調補署陽縣知縣可  
期認真經理所遺吳堡縣知縣事簡民淳較爲易  
治卽以譚瑀對調亦堪勝任據藩臬兩司會詳請  
奏前來臣查該二縣雖同一簡缺而情形難易今昔  
實有不同合無仰懇

天恩俯准將吳堡縣知縣蔣召南與畧陽縣知縣譚瑀  
互相調補一轉移間人地各得其宜洵於公事有  
益如蒙

俞允該員等係以簡對調毋庸送部引

見竝免查敘參罰處分臣爲慎重地方起見謹會同陝

甘督臣富呢揚阿合詞恭摺具

奏伏乞

皇上聖鑒訓示謹

奏 道光二十四年十月二十三日具

奏奉

硃批另有旨欽此內閣奉

上諭李星沅奏知縣人地未宜揀員對調一摺著照所  
請陝西畧陽縣知縣准其以蔣召南調補所遺吳堡  
縣知縣員缺卽以譚瑀對調該部知道欽此

北山歉收州縣懇

恩緩徵摺子

奏爲查明北山歉收州縣懇

恩緩徵積欠銀糧仰祈

聖鑒事竊照藩司陶廷杰詳稱據榆林府知府徐松以  
所屬榆林葭州懷遠神木府谷五州縣本年所種  
秋禾收成僅止五分有餘均屬歉薄且葭州府谷  
又間被雹傷除府谷縣被雹之區應徵本年正賦

錢糧業已另案請緩其未被雹地方並榆林葭州  
懷遠神木四州縣本年額徵地丁銀糧草束及榆  
林懷遠二縣本年出易出借倉穀葭州節年尾欠  
兵糧十三十五並二十二等年尾欠出易倉穀二  
十二四兩年借欠折色籽種銀兩神木縣二十二  
年民欠春借折色籽種銀兩二十三年出易倉穀  
均請照常全數徵收外所有榆林懷遠神木府谷  
四縣道光十三年起至二十三年止民欠緩徵地

丁銀糧草束以及該四縣竝葭州道光十一年起  
至二十二年止節年出易常社倉穀出借折色籽  
種口糧銀兩均請展緩又據署綏德州知州凌樹  
棠以該州暨所屬清澗米脂吳堡三縣本年各色  
秋禾播種以後雨澤稀少長發未能暢茂收成亦  
止五分有餘體察民情未免竭蹶應請量予調劑  
除各州縣本年下忙地丁銀糧均已徵解通完其  
應完廣有新建兩倉本年兵糧草束全數徵收外



所有該州竝清澗米脂吳堡三縣未完展緩十三十六十九等年本色兵糧又十四六七等年未完出借折色口糧籽種銀兩竝出借常糧穀石均懇緩徵等情由司核明具詳請

奏前來

臣

查該州縣等地處北山民貧地瘠素鮮蓋

藏全以秋禾爲重今復收成歉薄若將新舊錢糧同時併徵民力實有未逮合無仰懇

天恩俯准將榆林懷遠神木府谷綏德清澗米脂吳堡

八州縣道光十三年起至二十三年止民欠緩徵  
地丁銀糧草束以及該八州縣竝葭州節年出易  
出借常社倉穀出借折色籽種口糧銀兩一概緩  
至道光二十五年秋後啟徵以紓民力之處出自  
鴻慈爲此恭摺具

奏伏乞

皇上聖鑒訓示謹

奏 道光二十四年十月二十三日具

奏奉

硃批另有旨欽此內閣奉

上諭李星沅奏查明北山歉收州縣請將積欠銀糧緩徵一摺陝西榆林等州縣本年秋禾收成歉薄若將新舊錢糧同時併徵民力恐有未逮加恩著照所請所有榆林懷遠神木府谷綏德清澗米脂吳堡八州縣道光十三年起至二十三年止民欠緩徵地丁銀糧草束以及該州縣竝葭州節年出易出借常社倉

穀出借折色籽種口糧銀兩著概緩至二十五年秋  
後啟徵以紓民力該撫卽刊刻謄黃徧行曉諭務使  
實惠及民毋任吏胥舞弊以副朕軫念民依至意該  
部知道欽此

臨潼縣官民捐修城垣懇

恩鼓勵摺子

奏爲官民捐修城垣事竣懇

恩分別獎勵仰祈

聖鑒事竊照臨潼縣城垣一座周圍長七百八十丈高  
二丈七尺堞堞磚砌餘係土築自乾隆二十一年  
補修後迄今久逾固限雖經嘉慶年間酌量擇要  
捐修近因日炙雨淋漸多傾圯非及時修葺不足

以資捍衛惟值各工停緩未便請項該縣前任知縣賈芳林首先捐勸移交接署知縣潘政舉暨現任知縣劉建韶先後勸諭紳商士民亦皆踴躍樂輸集有成數劉建韶隨派紳士董理仍率同典史分往稽查督辦於道光二十三年二月初十日開工至十二月初三日將城身堞堞門臺城樓礮臺馬道柵欄鏑樓水簸箕海漫竝新建元武廟魁星樓及卡房等項工程逐一修理完竣統計官民捐

銀二萬八千九百三十兩內知縣賈芳林捐銀一千兩劉建韶捐銀五百兩士民捐銀二萬七千四百三十兩除用過工料銀二萬八千八百四十一兩零餘銀八十八兩零撥修考棚詳經飭委清軍同知勘驗一律如式工堅料實竝無偷減草率情弊據該管府道查明由藩司陶廷杰核議具詳請奏前來

臣

查臨潼爲省東通衢縣城實一方保障年

久未修勢難再緩該官民等捐資辦理衆志成城

洵於地方有益自應酌加獎叙除捐數較少者由外辦理並將捐銀二三百兩之民人及董事出力紳士等咨部照例議叙外所有捐銀五千兩之監生宋致賢一千二百兩之民人楊生榮楊生甲一千兩之民人周凌霄段錫祿七百兩之生員賀奠堃五百兩之監生郝得壽鄧允治民人劉丕烈李克理朱毓麟宋德盛四百六十兩之民人黃忠仁四百兩之民人段文博葉梧韋維盛王道瀛王興



善王維泰王福泰孫鴻成睢純連二十二名相應  
請

旨交部照例給予職銜至現任臨潼縣知縣劉建韶捐  
銀五百兩據稱不敢仰邀議叙其前任臨潼縣告  
病知縣賈芳林於巨萬要工力籌興辦首先倡捐  
銀一千兩具見盡心民事接署知縣現任大荔縣  
知縣潘政舉續行勸捐多金亦屬勤奮出力臨潼  
縣典史陸藝先後隨同勸捐復督率工匠認真經

營不辭勞瘁可否仰懇

天恩一併交部從優議叙以示鼓勵之處出自

鴻慈再此項工程係官民捐辦請免造冊報銷除各捐戶履歷清冊送部外所有縣城捐修竣事緣由理

合恭摺具

奏伏乞

皇上聖鑒謹

奏  
道光二十四年十月二十五日具

奏奉

硃批另有旨欽此內閣奉

上諭李星沅奏官民捐修城垣懇恩獎勵一摺著吏部  
議奏此項工程免其造冊報銷該部知道欽此

查明完場年老諸生摺子

奏爲查明鄉試年老士子未經中式循例奏

聞仰祈

聖鑒事竊照文闈鄉試年屆八十諸生三場完竣者例  
應於揭曉後查明具

奏又嘉慶十八年禮部議定章程奉

旨歷科鄉會試後查明年老諸生三場完竣者分別加恩  
用以嘉惠耆儒行之已久未便遽爾停止著仍照舊查

辦惟浮開年歲人數冒濫其弊不可不除著照舊例遞  
加十歲方准列入等因欽此欽遵在案本年陝西甲辰

恩科鄉試

臣

於揭曉後卽飭藩司將完場年老諸生查

明詳報復咨送陝甘學政金國均查對學冊實在

年歲移覆前來

臣

查陝西省年屆八十三歲之同

州府增生李震陽八十六歲之澄城縣附生劉景

森八十歲之蒲城縣附生劉作霖八十歲之米脂

縣增生杜占魁等四名均年逾八旬三場完竣榜

發未經中式該生等青衿勵志皓首窮經操觚不  
懈於芸窗注籍未登於蕊榜幸際

作人之

雅化宜邀

錫命之殊榮所有查明完場年老諸生緣由理合循例

恭摺具

奏伏乞

皇上聖鑒敕部核覆施行謹

李文恭公奏議

卷六

陝撫

四三

奏 道光二十四年十月二十五日具

奏奉

硃批禮部議奏欽此

官紳士庶捐輸請獎摺子

奏爲官紳士庶捐輸河工經費續懇

天恩優獎以示鼓勵仰祈

聖鑒事竊照陝省官民兩次捐輸河工經費共銀十三

萬二千二百八十三兩經

臣

先後

奏請獎勵在案茲復據長安渭南臨潼富平藍田三

原轍屋耀州鳳翔郿縣寶雞華陰華州鎮安長武

三水武功等十七州縣紳民及流寓生監人等竝



現在候補候選各官續捐銀兩截至十一月十九日止共銀七萬七千五百六十兩由藩臬兩司按照捐數彙議具詳請

奏前來

臣

查陝省民情樸厚勉力急公近復疊次捐

輸稊末涓流胥徵忱悃卽官員流寓人等均各報效維殷自宜一體飭收遂其向善之志隨就司議獎叙逐加參核與豫工事例及捐輸成案均屬相符相應分別等差照繕清單恭呈

御覽仰懇

皇上逾格

恩施俯加獎勵用昭激勸至續捐銀數計奏請議叙者  
其銀三萬九千二百七兩四錢又咨部議叙者其  
銀二萬六千五百二十一兩一錢又不及議叙由  
外給予花紅匾額者其銀一萬一千八百三十一  
兩五錢現俱收貯司庫聽候撥用爲此恭摺具  
奏伏乞

皇上聖鑒訓示謹

奏 道光二十四年十一月二十五日具

奏奉

硃批該部議奏單併發欽此

附奏陳謝免議片子

再臣前奏降補捐輸許麗京徐鎮二員各竭微貲

急公報效臣以事由請獎尙非藉端例准指捐卽

同畱省故敢另片陳明擬請將該二員均以佐雜

畱陝補用嗣經吏部奏駁并請將臣議處奉

上諭該撫業將原案附片聲明著加恩免其議處等因

欽此荷

鴻施之下逮實感悚以難名爲此恭謝

天恩伏乞

聖鑒謹

奏

硃批覽欽此

查禁私錢摺子

奏爲陝省各屬查禁私錢循例奏

聞仰祈

聖鑒事竊照私鑄小錢行使定例責成州縣隨時訪拏

究辦竝於歲杪出具境內竝無私鑄及行使小錢

印結詳報督撫具奏一次等因本年陝省各屬經

臣督飭剴切嚴禁認真查緝去後旋據長安縣訪

獲客民黃萬州楊春等私鑄銅錢一起當將黃萬

州擬軍楊春減等杖徒嗣黃萬州在監病故楊春  
親老畱養均先後咨部在案此外各廳州縣均於  
境內隨時隨事嚴密稽查尙不致有行使小錢以  
及私鑄之弊現在時屆歲杪據該廳州縣等出具  
境內竝無私鑄及行使小錢印結由藩臬兩司核  
明會詳請

奏前來臣覆核無異除仍責成實力躋訪毋得視為  
具文外所有二十四年分各屬查禁私錢緣由理

合循例恭摺具

奏伏乞

皇上聖鑒謹

奏 道光二十四年十二月二十五日具

奏奉

硃批知道了欽此



附奏京控咨交案件竝無逾限片子

再前准吏部咨欽奉

上諭各省京控咨交案件嗣後著各該督撫將逾限未結之案每屆半年彙奏請旨交部議處一次俾承辦各員咸知儆畏等因欽此欽遵在案查陝省京控咨交案件自本年六月以來止有長安縣民王普修一起甫於十月二十七日接准都察院咨送到陝現已行司提訊審辦核計限期竝無遲逾除督飭

承辦各員隨時審擬依限辦理外所有查明京控  
案件竝無逾限緣由理合附片陳明謹

奏

硃批知道了欽此

附奏委署府縣各員片子

再興安府知府徐棟欽奉

諭旨調補漢中府知府應卽飭令接任所遺興安府缺  
查有清軍同知宋恒祥才具明晰堪以委署又寶  
雞縣知縣崇杞林現准部咨升補鄜州直隸州知  
州亦須先赴新任所遺員缺查有蒲城縣知縣朱  
大源辦事奮勉堪以委署據藩臬兩司會詳前來  
除批飭道照外理合循例附片陳明謹

奏

硃批覽欽此

覆奏府谷葭州被雹來春毋庸接濟摺子

奏爲遵

旨查明據實覆奏仰祈

聖鑒事竊

臣

接准軍機大臣字寄道光二十四年十月

初三日奉

上諭本年陝西府谷縣被雹經該省奏到已隨時加恩  
分別緩徵再葭州被雹已據該撫奏明隨時撫卹並  
將來春應否接濟之處一併查明於封印前奏到等

李文恭公奏議

卷六

陝撫

五十一

因欽此仰見

皇上軫念黎元

恩施無已之至意當卽欽遵恭錄行司分飭確查去後  
茲據藩司陶廷杰轉據該管道府覆稱葭州府谷  
二州縣前次被雹較輕均經隨時借給籽種銀兩  
竝緩徵新舊錢糧本年秋收中稔今冬明春足資  
餬口民力不致拮据等情前來臣復詳加體察該  
州縣被雹情形本不甚重業經分別卹緩秋禾補

種亦各收成民食有資來春毋庸再爲接濟所有  
遵

旨查明緣由理合恭摺據實覆

奏伏乞

皇上聖鑒謹

奏 道光二十四年十二月初五日具

奏奉

硃批知道了欽此

典史疎防監犯砍斃人命奏參革審摺子

奏爲特參疎防監犯砍斃人命之典史請

旨革職提審仰祈

聖鑒事竊照洛川縣監犯鄧夫印於本年十一月初七日早因與同監犯人楊循娃爭取洗臉水口角起衅用菜刀將楊循娃頂心相連右額角偏左砍傷維時該縣知縣劉桂楨因公至州接據典史稟報當卽馳回查明飭醫調治罔效延至初九日楊循



娃因傷殞命現經該管鄜州委員驗明屍傷填格  
錄供通詳等情臣查鄧夫印係戳傷呂姓身死審  
依鬪殺律擬絞監候尙未奉准部覆其已死楊循  
娃係毆傷無服族人楊思俊越日因風身死擬絞  
監候秋審緩決三次之犯該典史王繩武管獄是  
其專責乃不督率刑禁人等小心防範以致該犯  
刀斃人命殊屬玩泄且監獄重地理宜嚴肅菜刀  
從何而來更恐有通同受賄鬆放刑具情弊亟須

澈底根究據藩臬兩司詳揭前來相應請

旨將洛川縣典史王繩武革職以便提同兇犯竝刑禁  
人等研訊有無賄縱及與囚金及情事按律擬辦  
至有獄官洛川縣知縣劉桂楨於鄧夫印在監釀  
命是否實係公出有無規避處分容俟查確另參  
除委員前往接署摘取該典史鈐記外謹會同陝  
甘督臣富呢揚阿合詞恭摺具  
奏伏乞

皇上聖鑒訓示謹

奏 道光二十四年十二月初五日具

奏奉

硃批另有旨欽此內閣奉

旨這所參疎防監犯砍斃人命之陝西洛川縣典史王  
繩武著卽革職交該撫提同兇犯竝刑禁人等研訊  
有無賄縱等情按律定擬洛川縣知縣劉桂楨是否  
公出竝著查明具奏欽此

請獎獲盜出力人員摺子

奏爲查明獲盜出力人員籲懇

天恩分別鼓勵恭摺奏祈

聖鑒事竊惟安民以弭盜爲先弭盜以得人爲亟陝西

界連五省徑關兩山地廣林深易滋伏莽經臣隨

時飭司督屬嚴密查拏總期有匪必擒有犯必獲

地方官交相儆惕自顧考成緝捕漸收成效臣惟

以賞功罰過明示要約其不甚得力者必不肯稍

爲姑息其較爲出力者必不忍沒其微勞茲據各屬卷案悉心校核除獲犯一二名應行議叙各員業經隨案聲請及本境應緝要犯不敢濫邀甄叙外查有畧陽縣縣丞吳應剛前經委赴豫省南陽府一帶躡緝藍田縣民趙合盛被劫案內逃盜旋據拏獲罪應斬決盜犯馮麻子王舉二名罪應發遣盜犯屈發源魯洗明二名又通判銜岐山縣知縣李文瀚首先拏獲疊劫甘肅徽縣事王張耀寶

雞縣事王治忠孝家衣物輪姦事王治席氏案內  
罪應斬梟盜犯張發榮卽蕭老么罪應斬決盜犯  
汪三卽汪廣子二名竝迭劫鳳縣事王趙尹氏等  
家罪應斬決夥盜張添才罪應發遣夥盜李轉太  
二名又前任涇陽縣知縣升補隴州知州馬國翰  
拏獲夥劫中部縣事王焦士義家輪姦焦趙氏案  
內罪應斬梟盜犯劉欣原卽劉裁縫一名均屬緝  
捕勤能認真出力由藩臬兩司會詳請

奏前來臣查李文瀚馬國翰拏獲鄰境斬梟盜犯本

屬例得聲叙送部引

見之員吳應剛所獲盜犯斬決未至三名與例稍有未  
符惟上年曾獲刀匪孫雙子等多名此次奉委出  
省自備資斧設法躋訪將及一年較尋常獲盜倍  
加勞勩且係早經俸滿保薦奉

旨應升人員當此整飭捕務之時合無仰懇

天恩俯准將署陽縣縣丞吳應剛以知縣不論繁簡酌

量補用通判銜岐山縣知縣李文瀚以知州升用  
先換頂戴隴州知州馬國翰以同知直隸州升用  
俾間屬文武咸資觀感以昭激勸之處出自

鴻慈爲此恭摺具

奏伏乞

皇上聖鑒訓示謹

奏 道光二十四年十二月初五日具

奏奉



硃批另有旨片留中欽此內閣奉

上諭李星沅奏請將獲盜出力人員分別鼓勵一摺著  
吏部議奏欽此

附奏專摺陳奏保舉獲盜出力各員緣由片

再臣於本年四月附奏變通保甲成式稽查北山

游民並各屬拏獲盜匪名數欽奏

硃批所辦甚好勉之毋懈欽此臣以奸匪一日不靖善

良一日不安節經札司嚴切飭拏自四月至今除

命案兇犯不計外復據先後報獲強劫輪姦搶竊

拒捕問擬斬絞遣軍流徒各犯一百二十一名軍

流逃犯及刀匪一百六十三名並於盜案竄出盜

線窩家均經隨時盡法審辦閭閻悉臻靜謐各州  
縣才具不等自臣就案參撤尙知講求捕務黽勉  
小心誠能以勸懲可期日有起色現查李文瀚  
馬國翰吳應剛三員獲盜出力均有例得甄叙計  
隨案聲請與專摺陳

奏同一升途然循例保送則視若故常至奉

旨特升則羣相感奮蓋無所勸而爲善不可以例中材  
有所待而後興正可以維積習臣身膺疆寄斷不

敢意存見好逾格邀

恩而緝捕有關地方獎勵有關緝捕實爲鼓舞人材起  
見謹再附片縷陳伏乞

聖鑒謹

奏

密奏司道府考語摺子

奏爲密陳司道知府考語仰祈

聖鑒事竊照藩臬道府人員居官賢否例應督撫歲杪  
出具切實考語密

奏一次臣於所屬各員職專考察萬不敢過於自信

謬謂真知而卽政事之純疵以審爲守之優絀需  
之歲時以要其久參之輿論以得其平似才力非  
無足徵而品地實各有等臣惟絕意氣之私祛耳

目之蔽勉期直陳無隱祇候

聖主權衡查陝省兩司五道七府除鳳翔府知府武訪  
疇甫經到任漢中府知府徐棟興安府知府吉昌  
甫准調補尙未到任均循例不加考外所有藩臬  
道府各員謹就臣愚所知密註切實考語手繕清  
單恭呈

御覽伏乞

皇上聖鑒謹

奏 道光二十四年十二月初五日具

奏奉

硃批單片畱中欽此

恭謝

頒賞福字摺子

奏爲恭謝

天恩事竊臣齎摺差弁回陝捧到

恩賞

御書福字一方臣當卽出郊跪迎至署恭設香案望闕

叩頭祇領欽惟我

皇上乾元篤祐



泰運延洪平康昭

禹範之庥

祥開嚮五熙皞普

堯衢之治頌協呼三

頒韶而

福其春來介景則

恩從日下

典先行慶歡洽迎年

臣

忝領封圻迭更歲序懍鶉濡而

時慙報稱懷燕譽而溼被

隆施候啟

珠杓

露綵徧八方之澤喜詹

寶字

天題集百順之名煥

斗極以紅雲

辰居寵賁騰函關之紫氣

申錫榮膺願偕二陝以心廣豐綏魚兆敬上九如而頂

祝益戴

鴻慈所有

微臣

感忭下忱理合繕摺恭謝

天恩伏乞

皇上聖鑒謹

奏 道光二十四年十二月二十六日具

奏奉

硃批知道了欽此

查明錢糧完解數目摺子

奏爲查明錢糧完解數目循例奏

聞仰祈

聖鑒事竊照嘉慶八年五月內准戶部咨開令將新舊錢糧數目於十二月內先行奏明仍於次年四月內具題等因歷經遵照在案茲據藩司陶廷杰詳報道光二十四年分額徵民屯更起運並糧折等項內除各屬畱支外實應解司銀一百三十三萬

一千四百三十九兩零自本年二月起至五月底  
止已完銀九十萬二千五百一十四兩零未完銀  
四十二萬八千九百二十五兩零自六月起至十  
一月底止續完銀三十八萬四千九百兩零均經  
解貯司庫仍未完銀四萬四千二十四兩零統計  
本年新舊錢糧已完九分六釐有餘又帶徵道光  
十九年舊欠未完緩徵銀七百一十二兩零竝十  
六年舊欠未完緩徵銀四百六十五兩零因榆林

懷遠神木府谷等縣二十四年秋收復歉

奏明緩至二十五年秋後啟徵是以均仍未完等情

具詳請

奏前來

臣

覆核無異除將未完銀兩嚴飭督催趕緊

徵解外所有道光二十四年分額徵正賦及舊欠  
銀兩截至十一月底止已未完數目理合循例具  
奏伏乞

皇上聖鑒謹

奏道光二十四年十二月二十六日具

奏奉

硃批戶部知道欽此

附奏委署同州府知府片子

再同州府知府汪于泗報丁父艱經臣另行恭疏

具

題所遺印務查有潼關廳同知濮城老成練達堪以  
委令署理至同州府一缺係衝繁難要缺所轄十  
廳州縣中多漢回雜居民情健悍如大荔蒲城朝  
邑等處訟獄滋繁向稱難治均賴知府表率整飭  
非精明強幹熟悉吏事之員不足勝任理合附片



具陳循例請

旨簡放以重職守伏乞

聖鑒謹

奏

硃批另有旨欽此內閣奉

上諭陝西同州府知府員缺著李恩繼補授欽此

附奏委署廳縣各員片子

再潼關廳同知一缺爲入陝門戶事劇差繁查有  
畱壩廳同知賀仲城明敏精詳堪以委署又定遠  
廳同知羅定約因案撤任查有渭南縣知縣余炳  
燾樸實勤能堪以署理所遺渭南縣衝途要缺查  
有咸甯縣知縣陸銓歷練開展堪以署理又大荔  
縣知縣潘政舉精細明決堪以委署咸甯縣篆據  
藩臬兩司會詳前來除批飭遵照外合併陳明謹

奏

硃批覽欽此